

welcher burger oder einwohner bey denn branthenwein in heusern gefundenn wirdt, der soll nicht mitt dem gehorsamb, sondernn in der büttelei mitt dem gefengknus gestrafft werdenn.

Von muscaten holenn.

Denn weibernn, die nicht gebethenn werdenn, soll das muscaten holenn uffn kindtteuffenn gantzlich verbottenn sein und welche daruber befundenn, die sollenn den gerichtsknechtenn frey sein inn die buttelei zu furenn.

Unnd domitt sich ein ider fur schadenn zu huttenn, soll er hie-mitt gewarnet sein, das sonderliche personenn zu auffsehernn vor-ordnet sein, die hierauff guthe achtung gebenn, das dem allenn wie obsteheht geburlich wirgklich nachgesatztt, die vorbrechere angezeigtt unnd inn unnachleßliche straff genhommenn werdenn sollenn.

Zu urkundtt mitt der stadt Dreßdenn kleinern secret bedrucktt. Signatum Dreßdenn denn 27. Februarii im 70^{ten} jar.

(L. S.)

Von Gottes gnaden Augustus
herzogk zw Sachssen, churfurst.

Lieben getrewen. Uns ist ewere gefaste markt- unnd andere ordenunge, welche ihr bis uff unsern gefallen ufs papir bringen lassen und uf vorgehenden unsern consens zu publicirn bedacht weret, vorbracht worden; die haben wir durchsehen und lassen uns solche gnedigst also gefallen, begern auch hiemit, ihr wollet die ordentlich artickelsweise, wie ihr beyleufftigk aus beygebundenem extracte zw ersehen, ausfuerlich zusammenfassen unnd offentlich publiciren, auch bis an uns festigklich darob haltten.

Unnd damit solche ordenunge desto bestendiger ins werck möge gerichtet werden, so sehen wir vor gut an, auf das die umbliegenden dorffschafften unnd diejenigen, welche bisher die merkte alhier gebawet unnd allerlei essende wahre anher bracht, nicht ursach nehmen mögen, gar aussen zu bleiben unnd die victualien an andere angelegene ortte, do sie es ihres gefallens anwerden können, zu tragen, das ihr inn deme mit den negst angelegenen stedten, als Pirn, Freybergk, Meissen, Hain unnd andere vogleichunge trefft, das sie mit der essenden wahre auch keine höhere steigerung machen lassen; deme ihr dan wol witter nachzudencken und es solcher gestalt ins